

WOORDVERKONDIGING, GEMEENTE EN KERK, DIE JEUG, DIE WÊRELD

deur

DR. L. M. LE ROUX

Wanneer ons die Nuwe Testament bestudeer kry ons, om 'n beeld te gebruik, 'n goue driehoek nl. woordverkondiging, gemeente en kerk, en die derde hoekpunt is die diens van die gemeente of kerk in die wêreld. Anders gestel: Waar Gods Woord reg gepredik en die Sakramente bedien word volgens die instelling van Christus daar bring die Here God deur sy Heilige Gees sy Kerk byeen. ¹⁾ Hierdie Kerk word egter nie om sigselfs wil byeengebring nie. Daar is 'n Goddelike bedoeling mee nl. om uit te gaan in die wêreld sodat oral dieselfde kan gebeur. ²⁾ Die Kerk is uitgeroep tot verkondiger van Hom wat die Hoof van die Kerk en die Gemeente is nl. Jesus Christus. Hy roep die Kerk en hou ook self verder die geroepe Kerk in stand. Hy roep byeen deur sy Woord en die werking van sy Heilige Gees. Hy hou in stand deur dieselfde verkondigde Woord en die bediening van sy Heilige Sakramente soos Hy dit ingestel het. Met sy Sakramente, Heilige Doop en Heilige Nagmaal, beseël en bevestig Hy sy blye Evangelie wat verkondig moet word. Hy beseël en bevestig met heilige tekens en seëls wat Hy self bepaal het. Die verkondiging van sy Woord en die bediening van sy Sakramente vind volgens sy opdrag in verskillende gestalte plaas.

Die Sakramente het twee gedeeltes nl. die Heilige Doop en die Heilige Nagmaal. Die twee hoofgestaltes by die Woord-verkondiging is die proklamering (kérugma ³⁾ en die onderrig (didaskalia). In hierdie verskillende gestaltes van verkondiging en beseëling daarvan, word volwassenes sowel as kinders beoog. Niemand word uitgesluit uit die ryke erbarming van God nie. ⁴⁾

Daarom het die Kerk en gemeente 'n roeping teenoor sy kinders en jong mense en dit word in ons tyd genoem die kate-

¹⁾ Vgl. „Kort Begrip van die Christelike Godsdienst”, vr. en antw. 41.
Vgl. Die Heidelbergse Kategismus, Sondag XXI.
Vgl. „Die Nederlandsche Geloofsbelijdenis”, Artikel XXIX.

²⁾ Mt. 28:18-20 en Mark. 16:15.

³⁾ Vgl. Rom. 16:25, 1 Kor. 1:21, Mark. 16:15.
Vgl. ook Math. 28:20.

⁴⁾ Vgl. Doop Formulier.

gese en jeugwerk van die Kerk.⁵⁾ Die kategeese omvat die voorbereidende, die gewone en die belydeniskatkieasie. Dit is die leeropdrag van die Kerk.⁶⁾ Die jeugwerk van die kerk is eintlik 'n voortsetting van hierdie kategetiese taak in gewysigde vorm en aksent. Die jeugwerk staan in verband met die jongmense wat reeds die openbare belydenis van die geloof in die gemeente gedoen het en amptelik tot belydende lidmate verklaar is.⁷⁾

Daar is nie wesentlike verskil tussen kategeese en jeugwerk nie. Dit is eerder 'n kwessie van verskeidenheid en aksent as van verandering en verskil. Die doelstelling bly dieselfde: „Om die jeug in aanraking te bring met die Evangelie van Christus”.⁸⁾

Hulle moet die Woord hoor.⁹⁾ Die Heilige Gees open dan die hart en laat die gehoorde ingang vind. Die vrug van dieselfde Gees is dan die dankbare geloofsgehoorsaamheid.

Hierdie dankbare geloofsgehoorsaamheid is dan die derde punt van die driehoek nl. die diens van die barmhartigheid of die diakonia.¹⁰⁾

Die Kerkwet stel dit so: „Aan die Kerk is opgedra die vorming van die geestelike lewe van die jeug wat sy plek in die gemeente en in die wêreld moet inneem”.¹¹⁾

Die kinders en die jeug is integrale deel van die gemeente van Jesus Christus.¹²⁾ Van die geboorte en doop tot die volwassenheid ja tot die ouderdom en die dood, mees nog, tot in ewigheid is hulle die eiendom van Jesus Christus. Die beeld wat hierdie innige verband met Jesus Christus beskrywe, het Hy self gebruik nl. Hy is die ware wynstok en sy volgelinge is die ranke.¹³⁾

Alles hang dus af van die ware wynstok Jesus Christus. Die ontstaan en groei van sy gemeente vind plaas waar sy Evangelie, Hyself verkondig word in suiwerheid, en waar sy Sakramente bedien word soos Hy dit ingestel en bedoel het. Die derde nl. die diakonia is net so diep in Hom gegrond. Hy is die eintlike Diakonos. Hy betoon barmhartigheid aan die ander. Sy diakonia

⁵⁾ Vgl. „Kerkwet van die Nederduitsch Hervormde Kerk van Afrika”. Artikel X. en „Bepalings”, Hoofstuk I. Artikel 5 Hoofstuk V, Artikel 56, Hoofstuk IX. Artikel 1. Hoofstuk XVI, Artikel 1.

⁶⁾ Vgl. Matth. 28:10 (didaskontes). Vgl. ook „Bepalings”, Hoofstuk IX, Artikels 1-5.

⁷⁾ Vgl. „Bepalings”, Hoofstuk V, Artikel 2 (1964).

⁸⁾ Vgl. „Bepalings”, Hoofstuk V, Artikel 2.

⁹⁾ Vgl. Rom. 10:17.

¹⁰⁾ Vgl. Ef. 4:12 (dienswerk).

¹¹⁾ Vgl. „Die Kerkwet”, Artikel X.

¹²⁾ Vgl. „Doop Formulier”. Vgl. ook Mark 10:14vv.

¹³⁾ Vgl. Joh. 15:5.

is oneindig diep. Net Hy kon die mense so dien.¹⁴⁾ In ons dae praat ons van medemenslikheid. Daar was egter net een waaragtige Medemens nl. Jesus Christus. Egte medemenslikheid is dan alleen realiteit as dit uit hierdie enige Medemens kom tot die mense en dan deur middel van hulle weer na die ander. Alle medemenslikheid wat die band met die enige Medemens Jesus Christus verloor het, het sy voedende lewenswortel verloor.

Kommentaar en verklaring van die genoemde artikel uit die Kerkwet sal dus hierop neerkom: Die Kerk en gemeente dra verantwoordelikheid om die jeug in aanraking met die Evangelieverkondiging te bring sodat hulle hul plek in die gemeente kan kry. Daar moet die lewende verband van die geloof kom met Jesus Christus, die Enige waaragtige Medemens. Van hieruit volg dan die vanselfsprekende verlenging na die ander medemense.

In die teologie van die vorige en hierdie eeu, kry ons 'n verskuiwing van die antroposentriese na die teosentriese. Dit is opvallend by die studie van die Kerklike Jeugwerk vind ons dat die ontwikkeling van die Kerklike Jeugwerk ook dieselfde weg gevolg het.¹⁵⁾ Die eindpunt was dat die jeugwerk weer vanweë sy gehoorsaamheid aan die Evangelie, kom tot die lewende verband met die gemeente, en daarom tot die diens in die wêreld nl. barmhartigheid teenoor die medemense.

Die Kerk van Jesus Christus dra hierdie wesenstrek nl. (1) Die hoor van die Woordverkondiging tot geloof en met geloof. (2) Die uitgaan na die wêreld in geloofs barmhartigheid. By die Kerklike Jeugwerk word dit duidelik hoe dat ook alle afdelings van die kerklike arbeid, hierdie selfde wesenstrekke vertoon. Daarom: Woordverkondiging, Gemeente en Kerk, die Jeug, die Wêreld.

¹⁴⁾ Vgl. Mark. 10.45.

¹⁵⁾ Vgl. L. M. le Roux, **Kerklike Jeugwerk**, bl. 532 vv. Proefskrif 1963.